

## **Decretu Liberalizatziones: règulas noas intre supermercados e produtores de sa filiera agricula**

S'artìculu 62 de cussu chi crament “decretu Liberalizatziones” bogat a craru noas de importu pro su chi pertocat sas relatas cumertziales in sas bèndidas de produtos agrícolos e agroalimentares. Sa leze, chi at chèrtzidu mescamente su ministru de sas políticas agrícolas Mario Catania, cheret amparare sos produtores agrícolos dae sas condizioni cumertziales chi imponet sa GDO: tempos de pagamentu longos, iscontos retroativos, etz.

Su decretu istàbilit tempos de pagamentu seguros, òbrigat a fàghere totu sos contratos de fornidura pro iscritu, e narat cales sunt sos comportamentos proibidos in sas relatas cumertziales, in fines istàbilit un'apòsitu sistema de santziones.

Bidimus a finu su chi narat su decretu:

### **Forma iscrita**

Sa norma at istabilidu chi sos contratos de bèndida de produtos agrícolos e alimentares (francu cussos concruidos cun su consumadore ùrtimu) depent èssere obrigatoriamente fatos pro iscritu e depent inditare, si nono sunt nulos, su tempus chi durat su contratu, sa cantidad e sas propiedades de su prodotu bèndidu, su preju e règulas pro sa cunsinna e su pagamentu.

A prus de istabilire sa nullidade de sos contratos chi no inditant unu o prus de custos elementos, sa norma narat chi sa parte chi non rispetat custos òbrigos depet pagare una santziona administrativa, chi cambiat cunforme a su balore de sos benes chi ant bèndidu.

### **Tempos de pagamentu**

Su pagamentu de su tantu chi ant concordadu in contratu, su comporadore lu depet fàghere intro de 30 dies pro sos benes chi deterioràbiles\* e intro de 60 dies pro sos àteros, a cumintzare dae s'ùrtima die de su mese chi at retzidu sa fatura.

### **Interessos de mora**

Sos interessos cumintzant a si carculare dae sa die a pustis de s'iscadèntzia de su pagamentu. S'interessu legale (dae s'1/1/2012 est 2,5%) aumentat de àteros duos puntos e custu non podet èssere mudadu dae sa partes.

### **Santziones**

Si non si rispetat su tempus de su pagamentu, a prus de pagare sos interessos, su depidore chi non pagat faghet finas unu illitzitu administrativu, e pro custu depet pagare una santziona administrativa chi andat dae 500,00 èuros a 500.000,00 èuros, cunforme a su faturadu de s'azienda e a sa “recàida” de su ritardu.

## **Impedimentu de fàghere manizos cumertziales iscurretos**

Sa norma disponet, chi in sas relatas cumertziales intre operadores econòmicos – cumpresos finas sos cuntratos de bèndida de produtos agrícolos – non si podent impònnere, sena resone:

- conditziones graes e conditziones extracuntratuales retroativas;
- conditziones diferentes pro sas matessi atividade;
- fàghere dipèndere sos cuntratos o sa regularidade (o continuidade) de sas relatas cumertziales a àteras atividades chi non pertocant sos cuntratos o sas relatas cumertziales.

Finas si non si rispetant custas conditziones si faghet unu illàtzitu amministrativu punidu cun una santziona chi andat dae 516,00 èuros a 3.000,00 èuros cunforme a su benefitziu chi at retzidu chie no at rispetadu s'impedimentu.

## **Averguamentos**

Sos averguamentos e sas santziones chi previdet sa norma sunt impreadas dae s'Autoridade Garante pro sa Cuncurrèntzia e su Mercadu (AGCM) chi praticamente si faghet azudare dae sa Guardia de finantza.

## **Impreu**

Sa norma s'impreat in totu sos cuntratos fatos a pustis de su 24 de santugaine de su 2012 (die chi intrat in vigore su decretu leze), e finas a totu cussos cuntratos fatos in antis ma chi non sunt galu concruidos cumpretamente (ca galu no est fata sa cunsinna o su pagamento).

## **Efetos de sas normas noas**

Sas normas intrant in vigore a pustis de sete meses dae cando ant publicadu sa leze de cunversione de su decretu. Duncas dae su 24 de santugaine de su 2012.

## **Liniás ghias de impreu**

Intro de tres meses dae sa publicatzione de sa leze de cunversione su Ministru de sas Políticas Agrícolas, Alimentares e Furestales e cussu pro s'Isvilupu Econòmicu ant a fàghere unu decretu interministeriale, in ue ant inditare comente depent èssere impreadas sas normas noas.

## **Posizione de Confagricoltura**

Su Presidente de Confagricoltura Mario Guidi at declaradu: “semus a beru cumbintos chi siat netzessàriu a mezorare su podere cuntratuale in sa filiera agroalimentare cun interventos chi favoressant sa creresa e s'impreu de cesta norma subra sas relatas cumertziales pro sa bèndida de sos produtos agrícolos”.

\* Sos benes deterioràbiles sunt cussos chi rientrant in custas categòrias:

- a. Produtos agrícolos, de sa pisca e alimentares preconfetzionados chi zugent una data de iscàdentzia o un tempus mìnimu de cunservatzione non prus mannu de 60 dies;
- b. produtos agrícolos, de sa pisca e alimentares isfusos, cumpresas ervas e prantas aromàticas, finas si sunt cunfetzionados o refrizerados, chi durant finas a 60 dies;
- c. produtos a base de peta chi ant custas careterísticas fisicas e chìmicas: aW prus artu de 0,95 e pH prus artu de 5,2, o si nono aW prus artu de 0,91, o si nono pH totunu o prus artu de 4,5;
- d. totu sas zenias de late.